

太平御覽

太平御覽卷第五百八十五

文部一

叙文

易賁卦彖曰觀乎天文以察時變觀乎人文以化成天下
春秋襄二十五年傳曰鄭子產獻捷于晉獻入陳之助士莊伯
不能詰仲尼曰志有之言以足志文以足言不言誰知其
志言之無文行之不遠

論語曰孔子曰周鑒於二代郁郁乎文哉吾從周

又曰子貢曰夫子之文章可得而聞也夫子之言性與天
道不可得而聞也

又曰大哉堯之爲君也巍巍乎唯天爲大唯堯則之蕩蕩
乎民無能名焉巍巍乎其有成功煥乎其有文章

揚子法言曰或曰良玉不雕美言不文何謂也曰玉不雕

璵璠不作器言不文典謨不作經

桓寬益鐵論曰內無其實而外學其文若畫脂鏤冰費日損功

王充論衡曰學問習熟則能推類興文文由外而滋未必實才與文相副也

魏文帝典論曰夫文本同而末異蓋奏議宜雅書論宜理銘誄尚實詩賦欲麗文以氣爲主氣之清濁有體不可力強而致古之作者寄身於翰墨見意於篇籍不假良史之辭不託飛馳之勢而聲名自傳於後故西伯幽而演易周旦顯而制禮不以隱約而弗務不以康樂而加恩夫然則古人賤尺璧而重寸陰懼乎時之過已而人多不強力貧賤則懾於飢寒富貴則流於逸樂遂營目前之務而遺千載之功日月逝於上體貌衰於下忽然與萬物遷化斯志

士之所大痛也

晉摯虞文章流別論曰文章者所以宣上下之象明人倫之叙窮理盡性以究萬物之宜者也王澤流而詩作成功臻而頌興德勲立而銘著嘉美終而誄集祝史陳辭官箴王闕周禮太師掌教六詩曰風曰賦曰比曰興曰雅曰頌言一國之事繫一人之本謂之風言天下之事形四方之風謂之雅頌者美盛德之形容賦者敷陳之稱也比者喻類之言也興者有感之辭也後世之爲詩者多矣其功德者謂之頌其餘則惣謂之詩頌詩之美者也古者聖帝明王功成治定而頌聲興於是奏於宗廟告於鬼神故頌之所美者聖王之德也古之作詩也發於情止乎禮義情之發因辭以形之禮義之指頌事以明之故有賦焉所以假象盡辭敷陳其志古詩之賦以情義爲主以事類爲佐今

之賦以事形爲本以義正爲助情義爲主則言省而文有
例矣事形爲本則言富而辭無常矣文之煩省辭之險易
蓋由於此夫假象過大則與類相遠免辭過壯則與事相
違辯言過理則與義相失麗靡過美則與情相悖此四過
者所以背大體而害政教示以司馬遷割相如之浮說楊
雄疾辭人之賦麗以淫也

沈約宋書論曰民稟天地之靈含五常之德剛柔迭用喜
愠分情然則歌詠所興宜自生民始也周室旣衰風流弥
著屈平宋玉導清源於前賈誼相如振方塵於後英辭潤
金玉高義薄雲天自茲以降情志逾廣王褒劉向楊班崔
蔡之徒異軌同奔迤相師祖雖清辭麗曲時發于篇而蕪
音累氣固亦多矣若夫平子豔發文以情變絕唱高蹤久
無嗣響至于建安曹氏基命二祖陳王咸蓄盛藻自漢至

魏四百餘年辭人才子文體三變相如巧爲形似之言二班長於情理之說子建仲宣以氣質爲體源其賦流所始莫不同祖風騷降及元康潘陸特秀律異班賈體變曹王綉采星稠繁文綺合綴平臺之逸響採南皮之高韻遺風餘烈事極江右爰逮宋氏顏謝騰聲靈運之興會標舉延年之體裁明密並方軌前秀垂軌後昆

李充翰林論曰或問曰何如斯可謂之文荅曰孔文舉之書陸士衡之議斯可謂成文也

陸景典語曰所謂文者非徒執卷於儒生之門據筆於翰墨之采乃貴其造化之淵禮樂之盛也

文心雕龍曰人文之元肇自泰極幽讚神明易象惟先庖犧畫其始仲尼翼其終而乾坤兩位獨制文言言之文也天地之心哉若乃河圖孕乎八卦絡書韞乎九疇王版金

鑊之寶丹文綠牒之華誰其尸之亦神理而已自鳥迹代
繩文字始炳炎皐遺事紀在三墳而年世眇邈聲采靡追
唐虞文章則煥乎爲盛元首載歌旣發吟詠之志稷益陳
謨亦垂敷奏之風夏后氏興業峻鴻績九序詠譔勲德弥
縟逮及商周文勝其質雅頌所被英華日新文王憂患繇
辭炳燿符采複隱精義取深重以公旦多才振其微烈制
詩縉頌斧藻群言至若夫子繼聖獨秀前哲鎔鈞六經必
金聲而玉振雕琢性情組織辭令木鐸啓而千里應席珎
流而萬世響寫天地之輝光曉生民之耳目矣故爰自風
姓暨于孔氏立聖創典素王述訓莫不原道心以敷章研
神理以設教著象乎河洛間數乎蓍龜觀天文以極變察
人文以成化然後能纏緯區宇弥綸彞典憲發揮事業彪炳
辭義故道泐聖以垂文聖因文以明道旁通而無涯日用

而不匱易曰鼓天下之動者存乎辭辭之所以能鼓天下者道之文也

又曰方其擲翰氣倍辭前暨乎篇成半折心始何則意翻空而易奇言徵實而難巧也是以臨篇綴翰必有二患理鬱者始貧辭溺者傷亂然則博見爲饋貧之糧貫一爲拯辭之藥博而能一亦有助乎心力矣

又曰翬翟脩色而翔翥百步肌豐而力沉也鷹隼無采而翰飛戾天骨勁而荒猛也文章才力有似於此若風骨乏采則鷲集翰林采乏風骨則雉竄文囿若藻曜而高翔固文章之鳴鳳也

又曰括囊雜體功在銓別宮商朱紫隨勢各配章表奏議則准的平典雅賦頌歌詩則羽儀乎清麗符檄書移則指式於明斷史論序注則軌範於覈要箴銘碑誄則體制於

弘深連珠七辭則從事於功艷此脩體而成勢隨變而立
功者也雖復契會相參節文牙雜譬言五色之錦各以本采
爲地矣

又曰夫薑桂因地辛在本性文章治學能在天才故才自
內發學以外成有學飽而才餒有才富而學貧學貧者速
遭於事義才餒者劬勞於辭情此內外之殊分也是以屬
意於文心與筆謀才爲盟主學爲輔佐合德文采必霸才
學褊狹雖美少功才童學文宜正體制必以情志爲神明
事義爲骨髓辭采爲肌膚宮商爲聲氣然後品藻玄黃摘
振金玉獻可替否以裁厥中斯綴思之恒數也夫文變無
方意見浮雜約則義孤博則辭叛變故多尤而爲事賤且
才分不同思緒各異或製首以通尾或尺接以寸附然通
製者蓋寡接附者甚衆若統緒失宗辭味必亂義脉不流

則偏枯文體夫能懸識湊理然後節文自會如膠之粘木石之合玉矣是以四壯異力而六轡如琴馭文之法有似於此昔張湯疑奏而再却虞松草表而屢譴並事理之不明而辭旨之失調也及倪寬更草鍾會易字而漢武歎奇晉景稱善者乃理得而事明心敏而辭當也

宋范曄獄中與諸生姪書以自序其略曰吾少懶學問年三十許始有尚耳自尔已來轉爲心化至於所通處皆自得之宵懷常爲情志所託故當以意爲主以文傳意以意爲主則其旨必見以文傳意則其辭不流然後抽其芬芳振其金石耳

金樓子曰王仲任言夫說一經者爲儒生也傳古今者爲通人也上書奏事者爲文人也精思著文連篇章爲鴻儒也若劉子政楊子雲之列是也蓋儒生轉通人通人爲

丈人文人轉爲鴻儒也

又曰古之學者有二今之學者四焉夫子門徒轉相師授通聖人之經者謂之儒屈原宋玉枚乘長卿之徒止爲辭賦則謂文今之儒傳窮子史但能識其事不能通其理者謂之學至如不便爲詩閭纂善爲章奏如伯松若此之流謂之筆吟詠風謠流連哀思者謂之文唯湏綺縠紛披宮徵靡曼脣吻適會情靈搖蕩潘安仁清綺若是而評者止稱情切故知爲文之難也曹子建陸士衡皆文士觀其辭致側密事語堅明雖不以儒者命家此亦悉通其義也若夫今之俗也縉紳稚齒閭巷小生苟取成章貴在悅目龍首豕足隨時之宜牛頭馬騮強相附會夫挹酌道德憲章前言者君子所以行之也原憲云無財謂之貧學道不行謂之病末俗學徒頗或異此或假茲以爲伎術或狎之以

爲戲笑未聞強學自立和樂慎禮者也

齊書曰陸厥字韓卿少有風槩好屬文時盛爲文章吳興沈約陳郡謝朓琅邪王融以氣類相推轂汝南周顒善識聲韻約等文皆用宮商將平上去入四聲以此制韻有平頭上尾蜂腰鶴膝五字之中音韻悉異兩句之內角徵不同不可增減世爲永明體厥與約書曰范詹事自序性別宮商識清濁特能適輕重濟艱難古今文多不全了斯處縱有會此者此必不從根本中來沈尚書亦云自靈均已來此秘未覩或聞與理合匪由思至張蔡曹王曾無先覺潘陸顏謝去之弥遠大旨欲宮羽相變低昂舛節若前有浮聲則後須切響一簡之內音韻盡殊兩句之中輕重悉異辭旣美矣理又善焉但觀歷代衆賢似不都闇此處而云此秘未覩近於誣乎案范云不從根本中來尚書云匪由

思至斯則揣情謬於玄黃臆句着其音律也范又云時有
會此者尚書云或闇與理合夫思有合離前哲同所不免
文有開塞即事不得無之子建所以欲人譏彈士衡所以
遺恨終篇自魏文屬論深以清濁爲言劉楨奏書大明體勢
之致齟齬安帖之談操末續顛之說與玄黃於律呂以五
色之相宣苟此秘未覩茲論爲何所指耶至於掩瑕藏疾
合少謬多則臨淄所云人之著述不能無病者也長門
上林殆非一家之賦洛神池鴈便成二體之作王粲初
征他文未能稱是楊脩敏捷暑賦彌日不獻率意寡尤
則事促乎一日翳愈伏而理賒於七步一人之思遲速
天懸一家之文工拙壤隔何獨宮商律呂必責其如一
耶

三國典略曰徐摛字士秀東海郟人也負外散騎常侍起

之子文好新率不拘舊體梁武謂周捨曰爲我求一人文學俱長兼有德行者欲令與晉安遊處捨曰臣外弟徐摛形質陋小若不勝衣而堪此選梁武曰必有仲宣之才亦不簡其兒也乃以摛爲侍讀王爲太子轉家令文體旣別春坊盡學之謂之宮體宮體之號自斯而起

又曰齊主嘗問于魏收曰卿才何如徐陵收對曰臣大國之才典以雅徐陵士國之才麗以艷

後周書庾信父肩吾爲梁太子中庶子掌管記東海徐摛爲左衛率摛子陵及信並爲抄撰學士父子在東宮出入禁闥恩禮莫與比隆旣有盛才文並綺艷故世號爲徐庾體焉

太平御覽卷第五百八十五

太平御覽卷第五百八十六

文部

詩

文心雕龍曰詩者持也持人情性三百之蔽義歸無邪持之爲訓有符焉余人稟七情應物斯感感物吟志莫非自然堯有大唐之歌虞造南風之詩觀其二文詞達而已及大禹成功九序惟歌少康敗德五子咸諷順美匡惡其來久矣自商暨周雅頌圓備四始彪炳六義環深子夏鑒絢素之章子貢悟琢磨之句故商賜二子可以言詩自王澤弥竭風人輟采春秋觀志以諷誦舊章酬酢以爲賓榮吐納而成聲文逮楚國諷怨則離騷爲刺秦王滅典亦造仙詩漢初四言韋孟首唱匡諫之義繼軌周人孝武愛文栢梁列韻嚴馬之徒屬詞無方至成帝品錄三百餘篇朝章

國采亦云周備而詞人遺翰莫見五言所以李陵班婕妤見擬於前代按邵南行露始肇半章孺子滄浪亦有全曲暇豫優歌遠見春秋邪淫童謠近在成世閱時取徵則五言久矣又古詩佳麗或稱放叔其孤竹一篇則傳毅之詞比采而推固兩漢之作乎觀其結軀散文直而不野宛轉附物惆悵切情實五言之冠冕也至於張衡怨篇清典可味仙詩緩歌雅有新聲旣建安之初五言騰踴文帝陳思縱轡以聘節王徐應對望路而爭驅並隣風月狎池苑述思榮序酣宴慷慨以任氣磊落以使才造懷指事不求纖密之巧驅詞逐覓唯取昭晰之能此其所用也及正始明道詩雜仙心何晏之徒率多浮淺唯嵇志清峻阮旨遙深若乃應璩百一獨立不懼詞譎義具魏之遺直也晉世群才稍入輕綺張左潘陸比肩詩衢采縵於正始力柔於建安

或折文以爲武或流靡以自研此其大略也江左篇製溺於玄風羞突徇務之志崇盛志機之談索孫已下雖各有雕采而詞趣一揆莫與爭雄所以景純仙篇挺拔而爲雋也宋初文詠體有因華嚴老告退而山水方滋儼采百家之偶爭價一句之奇情必極貌以爲物必窮力而追新此近代之所竟也故鋪觀列代而情變之數可鑒撮舉同異而綱領之要可明矣若夫四言正體則雅潤爲本五言流調則清麗居宗華實異用惟才所安故平子得其雅叔夜合其潤茂先擬其清景陽振其麗若兼善則子建仲宣偏美則太冲公幹然詩有怕裁思無定位隨性適分鮮能圓通若妙識所難其易也將至忽以爲易其難也方來矣至於三六雜言則出自篇什離合之發則萌於曷識迴文所興則道原爲始聯句共韻則栢梁餘製巨細或殊情理同

致總歸詩囿故不繁云

列子曰堯微服遊於康衢聞兒童謠曰立我蒸民莫匪爾極不識不知順帝之則堯問曰孰教尔爲此言童兒曰我聞之大夫問大夫大夫曰古詩也

文章流別論曰詩言志歌永言古有採詩之官王者以知得失古詩之四言者振鷺于飛是也漢郊廟歌多用之五言者誰謂雀無角何以穿我屋是也樂府亦用之六言者我姑酌彼金罍是也樂府亦用之七言者交交黃鳥止于桑是也於俳諧倡樂世用之古詩之九言者洞酌彼行潦浥此注茲是也不入歌謠之章故世希爲之夫詩雖以情志爲本而以聲成爲節

顏延之庭誥曰荀爽云詩者古之歌章然則雅誦之樂篇全矣是以後之詩者率以歌爲名及秦勒望岳漢祀郊宮

辭著前史者文變之高制也雖雅聲未至弘麗難追矣逮
李陵衆作摠雜不類是假託非盡陵制至其善篇有足悲
者摯虞文論足稱優洽栢梁以來繼作非一纂所至七言
而已九言不見者將由聲度闡誕不協金石至於五言流
靡則劉楨張華四言側密則張衡王粲若夫陳思王可謂
兼之矣

鍾嶸詩評曰古詩李陵班婕妤好曹植劉楨王粲阮藉陸機
潘岳張協左思謝靈運等十二人詩皆上品曹植詩其原
出於國風其骨氣高奇辭彩華茂情兼雅怨躰備文質粲
然逸古卓尔不群嗟乎陳思之文章也譬人倫之有周孔
鱗羽之有龍鳳音樂之有笙竽女工之有黼黻若孔子之
門用文則公幹外堂思王入室王陽潘陸自可坐於廊廡之
間劉楨文躰出於古詩伏氣愛奇動多震絕楨骨氣凌霜

高風跨俗但氣過其文彫潤恨少然自陳思已往槓稱獨步張協景詩其原出於王粲文章華靜實少病累又巧構形似之言雄於潘岳靡於太冲風流調遠實曠代之高才其辭彩被藻音韻鏗鏘使人味之亶亶不倦阮籍詩其原出於小雅雖無彫斲之巧而詠懷之作可以陶性靈發幽致言在耳目之內情寄八荒之表洋洋乎會於風雅矣陶潛詩其原出於應璩又協左思風力文辭省淨殆無長語篤意真古辭興婉媚至如歡言酌春酒日暮天無雲風華清靡豈直田家語邪古今隱逸詩之宗也

漢書曰王褒字子淵蜀人也宣帝時修武帝故事講論六藝劉向張子儔等待詔金馬門褒有俊材使褒作中和樂職如淳曰言王政中宣布詩藝林曰宣帝選好事者依鹿鳴之聲習而歌之

魏書曰李康字蕭遠性介立不和俗爲鄉里所嫉故官不進嘗作遊九疑詩明帝異其文問左右斯人安在吾欲擢之因起爲隰陽長卒

晉書載記曰李壽奢侈殺人以立威其臣龔壯作詩七篇託言應璩以諷壽壽報曰省詩知意若今人所作時賢之話言也古人所作死鬼之常辭耳

又曰桓玄旣篡欲引用孟昶問其人於劉邁邁曰臣在京口不聞昶有異能但父子紛紛更相贈詩爾玄笑之而止宋書曰顏延之與陳郡謝靈運共以詞彩齊名而遲速懸絕文帝嘗各勅擬樂府以上篇延之受詔便成靈運久之乃就延之嘗問鮑昭已與靈運優劣昭曰謝五言如初發芙蓉自然可愛君詩若鋪錦列繡彫繪滿眼鍾嶸詩評云靈運詩其原出於陳思雅有景陽之舄嶸謂若人學多才

博寓目輒書內無文思外無遺物其繁且富宜哉然名章秀句處處間起妙曲新聲駱驛奔發類青松拔木白玉映竹未足以賡高才也

又曰謝惠連方明之子也十歲能屬文族兄靈運嘉賞之云每有篇章對惠連輒得佳語嘗於永嘉西堂思詩竟日不就忽夢惠連則得池塘生春草大以爲工常云此語有神工非余語也

趙書曰徐光字季武年十四五爲將軍秣馬光但書馬柳吾浪反柱爲詩頗不親馬事

梁書曰丘遲字希範薛采麗逸時有鍾嶸詩評云范雲婉轉清便如流風迴雪遲詩點綴映媚似落花依草雖義淺文通而秀於敬子其見稱如此

三國典略曰周文州氏苗反制鄜州刺史高琳討平之軍

還帝宴群公卿士命賦詩言志琳詩云寄言竇車騎爲謝
霍將軍何以報天子沙漠靜妖氛帝大悅曰德儉陸梁未
時欵塞卿言有驗國之福也

又曰齊蕭慤字仁祖爲太子洗馬嘗於秋夜賦詩其兩句
云芙蓉露下落楊柳月中踈曰蕭仁祖之斯文可謂雕章
間出昔潘陸齊軌不襲建安之風顏謝同聲遂革太乙之
氣自漢逮晉情賞猶自不諧河北江南意製本應相詭顏
黃門云吾愛其蕭散宛然在目而盧思道之徒雅所不愜
箕畢殊好理宜固然

又曰王晞爲常山王司馬晞恬憺寡欲不以世務爲累時
謂之方叔司馬常遊晉祠賦詩曰日落應歸去魚鳥見留
連時常山王遣使召晞晞不時至明日承相西閤祭酒盧
思道問晞昨已朱顏得無魚鳥致恠乎晞笑曰昨陶然以

酒被責卿輩亦是留連之一物豈直魚鳥而已哉

又曰辛德源嘗於邢邵座賦詩其十字曰寒威漸離風春色方依樹衆咸稱善後王昕逢之謂曰今日可謂寒威離風春色依樹

隋書曰楊素嘗以五言詩七百字贈番州刺史薛道衡詞氣宏拔風韻秀出亦爲一時盛作未幾而卒道衡歎曰人之將死其言也善豈若是乎

唐書文苑傳曰元萬頃乾封中從英國公李勣征高麗爲遼東道管記時別帥馮本以水軍援裨將郭封舡破失期封欲作書與勣恐高麗知其救兵不至乘危迫之乃令萬頃作離合詩贈勣勣不達其意大怒曰軍機急切何用詩爲必斬之萬頃解釋之乃止

又曰錢起能五言詩初從鄉薦家寄江湖嘗於客舍月夜

獨吟遽聞人吟於廷曰曲終人不見江上數峯青起愕然懾衣視之無所見矣以爲鬼恠而志之及起就試之年李暉所試湘靈鼓瑟詩題中有青字起即以鬼謠十字爲落句暉深嘉之稱爲絕唱是歲登第

又曰元稹聰警言絕人年少有才名與太原白居易爲友工爲詩善狀詠當時風態物色當時言詩者稱元白焉白衣冠士子至閭閻下俚悉傳諷之號爲元和體穆宗在東宮有妃嬪左右嘗念及稹篇詠者宮中呼爲元才子至是極承恩遇嘗爲長慶宮詞數十百篇閭里竟爲傳唱

又曰劉禹錫晚年與少傳白居易友善居易詩筆文章時無在其右者嘗與禹錫唱和往來因集其詩而序之曰彭城劉夢得詩豪者也其鋒森然少敢當者予不量力往往犯之夫合應者聲同交爭者力敵一往一復欲罷不能一二

年來日尋筆硯同和贈荅不覺滋多大和三年春已前紙墨所在者凡一百三十八首其餘乘興仗醉率然作者不在此數嘗戲微之云僕與足下二十年來爲文友詩敵幸也亦不幸也吟詠情性播揚名聲其適遺形其樂忘老幸也然江南士女語才子者多云元白以子之故使僕不得獨步於吳越間此亦不幸也今垂老復遇夢得非重不幸耶夢得文之神妙莫先於詩若妙與神則吾豈敢如夢得雪裏高山頭白早海中仙果子生遲沉舟側畔千帆過病樹前頭萬木春之句之類真謂神妙矣在在處處應有靈物護持豈止兩家子弟秘藏而已

世說曰夏侯孝若作周詩成示潘岳曰此文非徒溫雅乃見孝悌之性潘因此遂作家風詩

又曰孫秀收石崇潘岳先送石棄市潘後至石謂潘曰安

仁卿亦復尔耶潘曰可謂白首同所歸潘金谷詩云投分
寄石友白首同所歸乃成其詩

又曰孫子荆除婦服作詩以示王武子曰未知文生於情
情生於文覽之悽然憎伉儷之重

文士傳曰張秉自知短命乃作千年歌詩以自傷。顏氏家
訓曰王籍入若邪溪詩云蟬噪林逾靜鳥鳴山更幽江南
以爲文章斷絕物無異議簡文吟詠不能忘之

金樓子云有何贈智者常於任昉座賦詩而其詩言不類
任云卿詩可謂高厚其人大怒曰遂以我詩爲狗號

國朝傳記曰薛道衡聘陳爲人日詩云入春纔七日離家
已二年南人嗤之曰是底言語誰謂此虜解作詩及云人
歸落鴈後思發在花前乃喜曰名下固無虛士

國朝雜記曰沈佺期以工詩著名燕公張說嘗謂之曰沈

三兄詩直須還他第一

國史補曰德宗以二月一日爲中和節宴百寮賦詩群臣奉和詔寫本賜戴叔倫於容州天下榮之

又曰杜佑在淮南進崔叔清詩百篇上曰此惡詩焉用進時人謂之淮勅惡詩

陸機文賦曰詩緣情而綺靡

太平御覽卷第五百八十六

太平御覽卷第五百八十七

文部三

賦

詩序曰詩有六義焉一曰風二曰賦
釋名曰賦敷也敷布其義謂之賦也

漢書曰不歌而誦謂之賦登高能賦可以爲大夫言感物
造端材智深美可以與圖政事故可以列爲大夫也春秋
之後周道寢壞聘問歌詠不行於列國歌詠之士逸在布
衣賢人失志之賦作矣孫卿及楚臣屈原離譏憂國皆作
賦以風諭咸以惻隱古訓之義也其後宋玉唐勒漢興枚
乘司馬相如下及揚子雲競爲侈麗閎廣之語設其風諭之
義是以揚子稱之曰詩人之賦麗以則辭人之賦麗以淫
如孔氏之門用賦也則賈誼登堂相如入室矣

又曰上令王褒與張子儵等並待詔數從遊獵所幸宮館輒爲竊頌第其高下以差賜帛議者多爲淫靡不急上曰不有博奕者乎爲之猶賢乎已辭賦大者與古詩同義小者辨麗可嘉如女工有綺縠音樂有鄭衛今世俗猶皆以此娛說耳目辭賦比之尚有仁義風諭鳥獸草木多聞之觀賢於倡優博奕遠矣

又曰武帝以安車徵枚乘薛子臯母爲小妻乘之東歸也臯母不肯隨乘乘怒留臯與母居年十七上書自陳枚乘之子上得大喜召入詔使賦平樂觀善之拜爲郎臯不通經術談笑類俳倡爲賦頌好慢戲以故得潔黷貴幸此東方朔郭舍人等武帝春秋二十九乃得皇太子群臣喜故臯與東方朔皇太子生賦臯爲文疾受詔輒成司馬相如善爲文而遲故所作少

又曰上讀司馬相如子虛賦善之乃召相如相如曰此乃諸侯之事未足觀請爲天子遊獵之賦上令尚書給筆札相如以子虛虛言也爲楚烏有先生者烏有此事爲難亡是也欲明天子之義故虛藉此三人爲辭以推天子諸侯之苑囿其卒歸於節儉因以諷諫天子天子大悅時上好神仙相如又奏大人賦天子大悅飄飄有凌雲之氣游天地之間意

又曰趙昭儀方大幸每上幸甘泉常從在屬車間豹尾中故楊雄盛言車騎之衆參麗之駕非所以感動天地逆釐三神又言屏玉女却宓妃以懲齊戒之事賦成奏之天子異焉先是時蜀有司馬相如作賦甚弘麗溫雅雄心壯之每作賦常擬以爲式

後漢書曰王延壽字文考少遊魯國作靈光殿賦後蔡邕

亦造此賦未成及見延壽所爲甚奇之遂輟翰

又曰李充字伯仁少以文章顯名賈逵薦充召詣東觀受詔作賦拜蘭臺令史

魏志曰陳思王植太祖常視其文曰汝倩人耳植跪曰出言爲論下筆成篇固當面試時鄴銅雀臺新成太祖悉將諸子登使各賦植賦援筆立成太祖甚異之

吳書曰張紘作柵榴枕賦陳琳在北見之以示人曰此吾鄉里張子紘所作也後紘見琳武庫賦應機論與琳書歎美之琳荅曰自僕在河北與天下隔此間率少於文章易爲雄伯故僕受此過美之談非其實也今景在此足下子布在彼所謂小巫見大巫神氣盡矣

魏畧曰卞蘭獻賦贊述太子德美太子報曰作者不虛其辭受者必當其實蘭此豈玉實哉昔吾丘壽王一陳寶鼎

何武等徒以歌頌猶受金帛之賜蘭事雖不諒義足嘉也
今賜牛一頭

又曰邯鄲淳作投壺賦奏之文帝以爲工賜綃十疋

晉書曰孫綽絕重張衡左思賦云三都二京六經之鼓吹
也嘗作天台山賦辭致甚工初成以示友人范榮期云卿
試擲地當作金石聲也榮期曰恐此金石非中宮商然每
至佳句輒云應是我輩語

又曰桓溫欲經緯中國以河南粗平將移都洛陽朝廷畏
溫不敢爲異而北土蕭條人情危懼孫綽上疏言不可溫
見綽表不悅曰致意興公何不尋君遂初賦而知人家國
事耶

又曰顧愷字長康晉陵無錫人也博學有才氣嘗爲箏賦
成謂人曰吾賦之比嵇琴不賞者必當以後出相遺深識

者亦當以高奇見貴

宋書曰謝莊字希逸仕爲太子中庶子時南平王鑠獻赤鸚鵡帝詔羣臣爲賦太子左衛率索淑文冠當時作賦畢示莊及見莊賦歎曰江東無我卿當獨秀我若無卿亦一時之傑遂隱其賦

梁書曰張率爲待詔賦奏之甚見稱賞手勅荅曰相如工而不敏枚臯速而不工卿可謂兼二子於今之世矣

又曰沈衆字仲興好學有文詞仕梁爲太子舍人時武帝制千字詩衆因注解與陳謝景同時召見于文德殿帝命衆作賦賦成奏之手勅荅曰卿文體翩翩可謂無忝尔祖北齊書曰劉晝舉秀才入京考策不第乃恨不學屬文方復緝綴辭藻言甚苦拙制一首賦以六合爲名自謂絕倫吟諷不輟乃歎曰儒者勞而少工見於斯矣我讀儒書二

十餘年而荅策不第始學作文便得如是曾以此賦呈魏
收收謂人曰賦名六合其愚已甚及見其賦又愚於名
唐書曰獲嘉主簿劉知幾著思慎賦以刺時鳳閣侍郎蘇
味道李嶠見文相顧而歎曰陸機豪士之所不及也當今
防身要道盡在此矣

又曰文苑傳李華字遐叔善屬文與蘭陵蕭穎士友善華
應進士時著含元殿賦萬餘言穎士見而賞之曰景福之
上靈光之下

後唐書曰李琪少孤貧苦學尤精於文賦昭宗時李谿父
子以文學知名於時琪年十八九袖賦一軸謁谿谿覽賦
驚異倒履迎門因出琪啞鍾捧日等賦指尔謂琪曰予常
患近年文士辭賦皆數句之後未見賦題吾子入句見題
偶屬典麗吁可畏也琪由是以益知名也

摯虞文章流別論曰賦者敷陳之稱古詩之流也前世爲賦者有孫卿屈原尚頗有古之詩義至宋玉則多淫浮之病矣楚詞之賦賦之善者也故揚子稱賦莫深於離騷賈誼之作則屈原儔也

祢衡傳曰黃祖時大會賓客人有獻鸚鵡者祖舉卮酒於衡曰願先生賦之以娛佳賓衡攬筆而作文無加點辭采甚麗

文心雕龍曰詩有六義其二曰賦賦者鋪也鋪采摛文駢物寫志也昔邵公稱公卿獻詩師箴瞽賦傳云登高能賦可爲大夫詩序則同義傳說則異駢總其歸塗實相枝幹故劉向明不歌而頌班固稱古詩之流至如鄭莊之賦大隧士蒞之賦狐裘結言短韻詞自己作雖合作賦駢明而未融及靈均唱騷始廣聲貌然則賦也者受命於詩人而

祐字於楚辭者也於是荀況禮智宋玉風鈞爰錫名號與詩畫境六義附庸蔚成大國遂客主以首引極聲貌以窮文斯蓋別詩之源始命賦之厥初也秦世不文頗有雜賦漢初辭人循流而作陸賈扣其端賈誼振其緒枚馬洞其風王揚聘其勢臯朔以下品物畢圖繁積於宣時校閱於成世進御之賦千有餘首討其源流信興楚而盛漢矣若夫京殿苑獵述行叙志並體國經野義尚光大既履端於唱序亦歸餘於惣詞序以建言首引情本詞以理篇寫迭文勢觀夫荀結隱語事義自懷宋發誇談實始淫麗枚乘兔園舉要以會新相如上林繁類以成艷賈誼鳥致辨於情理子淵洞簫窮變於聲貌孟堅兩都明絢以贍雅張衡二京迅拔宏富子雲甘泉構深偉之風延壽靈光含飛動之勢凡此十家並辭賦之英傑也及仲宣靡密發篇必

道偉長博通時逢壯采太冲安仁策勲於鴻規士衡子安
底績於流製景純綺巧縟理有餘彦伯梗槩情韻不匱亦
魏晉之賦首也原夫登高之旨蓋覩物興情情以物興故
義必明雅物以情觀故詞必巧麗麗辭雅義符采相勝如
組織之品朱紫畫繪之差玄黃文雖雜而有實色雖糅而
有儀此立賦之大躰也然逐末之儔蔑棄其本雖讀千首
逾惑躰要遂使繁華析枝膏腴害骨無貫風軌莫益勸戒
此楊子所以追悔於雕蟲貽誚於霧縠者也

宋王太言賦序曰楚襄王旣登雲陽之臺命諸大夫景差
唐勒宋玉等並造大言賦賦卒而玉受賞又有能爲小言
賦者賦之雲夢之田而賦卒乃賜玉田

楊子法言曰或問曰吾子少而好賦曰然童子雕蟲篆刻
壯夫不爲詩人之賦麗以則辭人之賦麗以媸若孔氏之

門而用賦則賈誼外堂相如入室

崔鴻十六國春秋南涼錄曰禿髮傁檀子歸年始十三命爲高殿賦下筆即成影不移漏傁檀覽而善之擬之於曹子建又前秦錄曰苻堅宴羣臣于逍遙園將軍講武文官賦詩有洛陽年少者長不滿四尺而聰博善屬文因朱彤上逍遙戲馬賦一篇堅覽而奇之曰此文綺藻清麗長卿儔也西京雜記曰長安有度虬亦善爲賦常爲清思賦時人不貴虬乃託以相如作遂大重於世焉

又曰相如將獻賦而未知所爲夢一黃衣翁謂之曰子可爲大人賦言神仙之事以獻上

賜錦四匹

又曰司馬長卿賦時人皆稱典而麗雖詩人之作不能加也揚子雲曰長卿賦不從人間來神化所主耳子雲學相如爲賦而不逮是故雅服焉

又曰司馬相如爲上林子虛賦意思蕭散不復與外相關
摶引天地錯綜古今忽然而睡煥然而興幾百言而後成其
友人盛擘字長通牂牁名士嘗問以作賦相如曰今纂組
以成文列錦繡而爲質一經一緯一宮一商此作賦之迹
也賦家之心苞括宇宙愬覽人物斯乃得之於內不可得
其傳也乃作合組歌列錦賦而退身終不復敢言作賦之
心矣

博物志曰王延壽逸之子也魯作靈光殿初成逸語其子
曰汝鴛鴦狀歸吾欲爲賦文考遂以韻鴛簡其父曰此即好
賦吾固不及矣

三國典略曰齊魏收以溫子昇邢邵不作賦乃云會渢作
賦始成大才唯以章表自許此同兒戲

文士傳曰何楨字元幹青龍元年天子特詔曰楊州別駕

何禎有文章才試使作許都賦成封上不得令人見禎遂造賦上甚異之

又曰棘蒿見陸雲作逸民賦蒿以爲丈夫出身不爲孝子則爲忠臣必欲建功立策爲國宰輔遂作官人賦以反雲之賦

桓子新論曰予少時見楊子雲麗文高論不量年少猥欲追及業作小賦用思太劇而立感動發病子雲亦言成帝上甘泉詔使作賦爲之卒暴倦卧夢其五藏出地以手收之覺大少氣病一歲余少好文見子雲工爲賦頌欲從學子雲曰能讀千賦則善之矣

魏文典論曰今之文人魯國孔融廣陵陳琳山陽王粲北海徐幹陳留阮瑀汝南應璩東平劉楨此七子者於學無所遺於辭無所假如粲之初征登樓槐賦幹之玄猿漏卮

團扇枕賦雖張蔡不過也陳琳阮禹之章表書記今之雋也應璩和而不壯劉楨壯而不密孔融駢氣高妙有過人者

魏文臨渴賦曰余從上拜墳乘馬過水相伴高樹之下駐馬書鞭爲臨渴賦

世說曰左思字太冲齊國臨淄人也作三都賦十年乃成門庭戶席皆置筆硯遇得一句即便疏之賦成時人皆有譏訾思意甚不愜後示張華華曰此二京可三然君又未重於世宜以示高名之士思乃請序皇甫謐謐見之嗟嘆遂爲作序於是先相訾者莫不斂衽讚述焉陸機入洛欲爲此賦聞思作之撫掌而笑與第雲書此聞有傖父欲作三都賦湏其成當以覆酒瓮耳又思賦出機絕歎服以爲不能加也

又曰袁宏作東征賦列稱過江諸名德而獨不載桓彝溫甚恨之嘗以問宏宏曰尊君稱位非下官敢專旣未遑啓故不敢顯之溫曰君欲何爲詞宏即荅云風鑒散朗或搜或引身雖可亡道不可殞溫乃喜又不道陶侃侃子胡奴抽刃於曲室問袁君賦云何忽袁急而荅曰大道尊公何言無因曰精金百鍊在割能斷功以治民職思靜亂長沙之勲爲史所讚胡奴乃止

金樓子云劉休玄好學有文才爲水仙賦時人以爲不減洛神賦擬古詩時人謂陸士衡之流也余謂水仙不及洛神擬古勝乎士衡矣

閩川名士傳曰貞元中杜黃裳知貢舉試珠還合浦賦進士林藻賦成憑几假寐夢人謂之曰君賦甚佳但恨未叙珠來去之意尔藻悟視其草乃足四句其年擢第謝杜黃

裳謂曰唯林生叙珠來去之意若有神助

太平御覽卷第五百八十七

太平御覽卷第五百八十八

文部四

頌

讚

箴

頌

詩序曰頌者美盛德之形容以其成功告於神明者也
又曰丞弼尹吉甫美宣王也其詩曰吉甫作頌穆如清風
陸機文賦曰頌則優游以彬鬱

文章流別論曰頌詩之美者也古者聖帝明王成功治定
而頌聲興於是史錄其篇工歌其章以奏於宗廟告於神
明故頌之所美則以爲名或以頌形或以頌聲其細已甚
非古頌之意昔班固爲安豐戴侯頌史岑爲出師頌和熹
鄧后頌與魯頌體意相類而文辭之異古今之變也楊雄
趙充國頌頌而以雅傳毅顯宗頌文與周頌相似而雜以

風雅之意若馬融廣成上林之屬純爲今賦之體而謂之
頌失之遠矣

文心雕龍曰四始之至頌居其極頌者容也所以美盛德
而述形容也昔帝嚳之世咸累爲頌以歌九招自商頌已
下文理允備夫化偃一國謂之風風正四方謂之雅雅容
告神謂之頌風雅序人故事資變正頌主告神故義必純
美魯以旦次編商以前王追錄斯乃宗廟之正歌非饗燕
之恒詠也時邁一篇周公所製哲人之頌規式存焉夫三
閭橘頌情采芬芳比類屬興又覃及細矣至於秦政刻文
爰頌其德漢之惠景亦有述容公世並作相繼於時矣若
夫子雲之表充國孟堅之序戴侯武仲之美顯宗史岑之
述僖后或擬清廟或範駟那雖深淺不同詳略有異其褒
德顯容典章一也原夫頌惟典懿詞必清鏘敷寫似賦而

不入華侈之區敬慎如銘而異於規式之域榆楊以發藻
汪洋以樹儀雖纖巧曲致與情而變其大體所弘如斯而
已

漢書曰宣帝徵王褒爲聖主得賢臣頌褒對曰夫荷旃被
毳者難與道純綿之麗密羹藜含糗者不足與論大牢之
滋味今臣僻在西蜀生於窮巷之中長於蓬茨之下無有
遊觀廣覽之知不足以塞厚望應明旨雖然敢不略陳愚
而抒情素

又曰成帝時西羌嘗有警上思將帥之臣追美充國乃召
黃門郎楊雄即充國圖畫而頌之

後漢書曰帝召賈逵因勅蘭臺給筆札使作神雀頌

范曄後漢書曰肅宗治脩古禮巡狩方嶽崔駰上西巡頌
稱漢德帝雅好文章自見駰頌後常嗟歎之問侍中竇憲

曰寧知崔駰乎對曰班固數爲臣說之然未見帝曰公愛班固而忽崔駰此葉公之好龍也可試見之駰由此候憲憲屢履迎門笑謂駰曰亭伯吾受詔交公何得薄我哉遂揖入以爲上客

又曰傳毅與班固賈逵共典校書毅追美孝明帝功德最盛而廟頌未立乃依清廟作顯宗頌十篇奏之

又曰平望侯劉毅以和熹鄧太后有德教請令史官著長樂宮聖德頌以敷宣景耀勒勲金石縣之日月據之罔極以崇陛下蒸蒸之孝帝從之

魏志曰黃初三年黃龍見鄴西漳水中山王褒上頌賜黃金十斤

晉春秋曰懷帝陷於平陽劉聰加帝開府儀同三司會稽郡公引帝入醢謂帝曰卿爲豫章王時朕與王武子俱造

卿武子稱朕於卿卿言聞名久矣卿以所作樂府文示朕曰劉君聞君善詞賦試爲看也朕與武子俱爲盛德頌卿稱善者久之又引朕射于皇堂朕得十二籌卿與武子俱得九籌卿又贈朕柘弓銀硯卿頗憶否帝曰安敢忘之恨尔日不得早識龍顏聰曰卿家骨肉何相殘之甚邪帝曰此殆非人事皇天意也大漢將興應乾受曆故爲陛下自相驅耳且臣家若能奉武皇帝之業九族敦睦陛下何由得之聰甚有喜色

晉書曰劉臻妻陳氏聰敏能屬文嘗正旦獻椒花頌其詞曰旋穹周迴正朝肇建青陽散暉澄景載煥

臧榮緒晉書曰劉伶字伯倫沛國人也志氣曠放以宇宙爲狹著酒德頌爲建威叅軍以壽終

崔鴻春秋前燕錄曰慕容雋觀兵近郊見甘棠于道周從

者不識雋曰啼此詩所謂甘棠于道甘者味之主也木者春之行也五德屬仁五行主土春以施生味以養物色又赤者言將有赫赫之慶于中土吾謂國家之盛此其徵也傳曰外高能賦可以爲大夫羣司亦各書其志吾將覽焉於是內外臣寮並上甘棠頌

南史曰梁大同中嘗驟雨殿前往往有雜色寶珠梁武觀之甚有喜色虞寄因上瑞雨頌帝謂寄兄荔曰此頌典裁清拔卿之士龍也將加擢用寄聞之歎曰美盛德之形容以申擊壤之情耳吾豈買名求仕者乎

後周書曰顏之儀幼穎悟三歲能讀孝經及長博涉羣書好爲詞賦嘗獻神州頌辭以雅贍梁元帝手勅報曰枚乘二葉俱得遊梁應貞兩世並稱文學我求才子鯁慰良深江陵平之儀隨例遷長安世宗以爲麟趾學士

隋書志曰北齊中書侍郎杜臺卿上卅祖武成皇帝頌齊主以爲未能盡善令和士開以頌示李德林宣旨云臺卿此文未當朕意以卿有大才須叙盛德即宜速作急進本也德林乃上頌十六章并序武成覽頌善之賜名馬一疋鄭立別傳曰民有嘉瓜者異本同實縣欲表附文辭鄙略君爲改作又著頌二篇侯相高其才

王充論衡曰古之帝王建鴻德者湏鴻筆之臣褒頌紀德也

又曰永平中神雀羣集孝明詔上神雀頌百官上頌文比瓦石唯班固賈逵傳毅楊終侯諷五頌文比金玉

崔駰西巡頌表曰臣聞陽氣發而鷄庚鳴秋風厲而蟋蟀吟氣之動也唐虞之卅樵夫牧豎擊轅中韶感於和也臣不知手足之動音聲敢獻頌云

零陵先賢傳曰周不疑字文直曹公時有白雀瑞儒林並已作頌不疑見操授紙筆立令復作操奇之

讚

釋名曰稱人之美曰讚讚纂也纂集其美而叙之也

文心雕龍曰讚者明也助也昔虞舜之祀樂正重贊蓋唱發之詞也及益贊于禹伊陟贊于巫咸並颺言以明事嗟嘆以助詞者也故漢置鴻臚以唱拜為讚即古之遺語也至如相如屬詞如贊荆軻及史班書記以讚褒貶約文以惣錄頌體而論詞又紀傳後評亦同其名而仲治流別謬稱爲述失之遠矣及景純任雅動植必讚讚兼美惡亦猶頌之有變耳然本其爲義事生幾數所以古來篇體促而不廣必結言於四字之句繫桓于數韻之詞約舉以盡情照灼以送文比其體也發言雖遠而致用蓋寡大抵所歸

其頌家之細條也

李充翰林論曰容象圖而讚立宜使辭簡而義正孔融之讚楊公亦其美也

晉書曰嵇含紹之孫也弘農王粹以貴公子尚主館宇甚盛圖莊周於室廣集朝士使含爲子讚含援筆爲之文不加點其略曰嗟乎先生高迹何局生處巖岫之居死寄雕楹之屋旣非其所沒有餘辱粹有愧色

又曰衛恒字巨山爲黃門郎善草隸太康元年汲縣人盜發魏襄王冢得策書十餘萬言其一卷論楚者最爲工妙恒悅之故竭思以贊其美

世說曰羊孚作雪讚曰資清以化乘氣以霏遇象能鮮即潔成輝桓伊遂以書扇

箴

文心雕龍曰箴所以攻疾除患喻針石垣

又曰斯文之興盛於三代夏商二箴餘句頗存及周之辛甲百官箴闕唯虞箴一篇體義備焉迄至春秋微而未絕故魏絳諷君於右昇楚子訓人於在勤戰伐已來棄德務功銘辭代興箴文萎絕至楊雄稽古始範虞箴卿尹州牧二十篇及崔胡補綴摠稱百官指事配位鑒有徵可謂追清風於前古攀辛甲於後代者也至於潘勗符節要而失淺溫嶠侍臣博而惠繁主濟國子引多事寡潘君乘興義正體蕪凡斯繼作鮮有克衷至於王卽雜箴乃寘巾履得其戒慎而失其所施觀其約文舉要憲章武銘而水火井竈繁辭不已志有偏也夫箴誦於經銘題於器名用雖異而警戒實同箴全禦過故文資確切銘兼褒讚故理貴弘潤取其要也然天言之道蓋闕庸器之制久淪所以箴

銘實用窄施後代惟秉文君子宜酌其遠大矣

陸士衡文賦曰箴頓挫而清壯

周書曰夏箴曰小人無兼年之食遇天饑妻子非其妻子也大夫無兼年之食遇天饑臣妾非其臣妾也卿大夫無兼年之食遇天饑臣妾舉馬非其有也國無兼年之食遇天饑百姓非其有也

左傳襄元曰昔周辛甲之爲太史命百官官箴王闕

辛甲周武

王太史也闕過也百官各以箴以誠王過也

於虞人之箴曰

虞人掌

芒芒禹跡

畫爲九州

芒芒遠貌也

經啓九道

九道九州也

民有寢廟獸

有茂草各有攸處德用不擾

人神各有歸德不亂也

在帝夷羿冒于

原獸

忘其國恤而思其麀牡

言但獵武不可重

數重也

慨于夏家

羿以好武雖有夏家而不能慨大也

獸臣司原敢告僕夫

僕夫不敬也

范曄後漢書曰崔琦字子璋梁冀聞其才請與交冀行多
不軌琦數引古今成敗以誠之冀不能受作外戚箴
晉書曰張華懼后族之盛作女史箴以爲諷賈后雖凶妬
而知敬重華

又曰文帝子齊王攸武帝時爲太子太傅獻箴於太子其
略曰無曰父子之間昔有江充無曰至親靡二或容潘崇
諛言亂貞譖潤離親驪姬之讒晉侯疑申固親以道勿固
以恩修身以敬勿託以尊世以爲工

後周書曰齊王憲友劉休徵獻王箴一首憲夷之休徵後
又以此箴上高祖高祖方剪削諸弟甚悅其文

唐書曰元和中吏部郎中柳公綽獻太鑒箴曰寒暑滿天
地之間浹肌膚於外好愛溢耳目之前誘心知於內端潔
爲隄奔射猶敗氣行無間隙不在大睿聖之姿清明絕俗

心正無斜志高寡欲謂天高矣氣蒙晦之謂地厚矣橫流
漬之聖情超遙萬方賴之飲食所以資身也過則生患衣
服所以稱德也侈則生慢惟過與侈心必隨之氣與心流
疾亦伺之上深嘉歎降中使勞問

又曰敬宗遊幸無度李德裕獻丹宸箴六首霄衣箴曰先
王聽政昧爽以俟鷄鳴旣盈日出而視伯禹大聖寸陰爲
貴光武至仁反支不忌無俾姜后獨去簪珥彤彤管記言克
念前志又有正服罷獻納誨辨邪防微等箴文多不載帝
甚嘉之

胡廣百官箴叙曰箴諫之興所由尚矣聖君求之於下忠
臣納之於上故虞書曰予違汝弼汝無面從退有後言墨
子著書稱夏箴之辭

崔瑗叙箴曰昔楊子雲讀春秋傳虞人箴而善之於是作

爲九州及二十五管歲規臣救言君德之所宜斯乃體國
之宗也

太平御覽卷第五百八十八

太平御覽卷第五百八十九

文部五

碑

釋名曰碑被也此本葬時所設也於是鹿盧以繩被其上引以下棺追述君父之功美以書其上後人因爲焉故建道陌之頭名其文謂之碑也

文心雕龍曰碑者裨也上古帝皇紀號封禪樹石裨岳故曰碑也周穆紀迹于弇山之石亦古碑之意也又宗廟有碑樹之兩楹事止麗壯未勒勲績而甯器漸闕故後代用碑以石代金同乎不朽自廟徂墳猶封墓也自後漢已來碑碣雲起才鋒所斷莫高蔡邕觀楊賜之碑骨鯁訓典陳郭二文詞無擇言周胡衆碑莫不精允其序事也該而要其綴采已雅而澤清辭轉而不窮巧義出而卓立察其爲

才自然至矣孔融所創有墓伯喈張陳兩文辭洽之來亦其亞也及孫綽爲文志在於碑溫王邨庾詞多枝離桓彝一篇最爲辨裁矣此碑之致也屬碑之恥資乎史才其序則傳其文則銘標序盛德必見清風之華照紀鴻懿必見峻偉之烈此碑之致也夫碑實銘器銘實碑文因器立名事光於誄是以勒器讚勳者入銘之域樹碑述亡者同誄之區焉

禮記喪大記曰君葬用輅四紼二碑御輅用羽葆大夫葬用輅二紼二碑御輅用茅士喪用國車二紼無碑又祭義曰祭之日尸牽牲入廟門麗于碑

麗猶擊也

東觀漢記曰竇章女順帝初入掖庭爲貴人早卒帝追思之詔史官樹碑頌德章自爲之辭

范曄後漢書曰郭林宗卒同志者乃共刻石立碑蔡邕爲

其文旣而謂盧植曰吾爲碑多矣皆有慙德唯郭有道碑無愧色耳

又蔡邕傳曰邕以經籍去聖已久文字多謬俗儒穿鑿疑誤後學乃與五官中郎將堂谿典光祿大夫楊賜諫議大夫馬日磾議郎張訓韓說太史令單颺等奏求正定六經文字靈帝許之邕乃自丹於碑使工鐫刻太學門外於是後儒晚學咸取焉及碑始立其觀視及摹寫者車乘日千餘兩填塞街陌

魏志曰王粲與入共行讀道邊碑人問曰卿能闇乎曰能因使背而誦之不失一文

又曰鄧艾字士載年十二隨母至潁川讀陳寔碑文言爲世範行爲士則艾遂更名範字士則後宗族有與同者故改焉

晉書曰隱逸傳戴逵字安道譙國人也少博學好談論善屬文能鼓琴工書畫其餘工藝靡不畢綜捫角時以鷄卵汁澆白瓦屑作鄭玄碑又爲文而自鐫之詞麗器妙時人莫不驚歎

又曰郭璞爲庾冰筮曰墓碑生金庾氏大忌後冰子爲廣州刺史碑生金爲桓溫所滅

又曰杜預好爲後世名常言高岸爲谷深谷爲陵刻石爲二碑紀其動績一沉萬山之下一立峴山之上曰焉知此後不爲陵谷乎

又曰孫綽少以文才垂稱于時文士綽爲其冠溫王郗庾諸公之薨必須綽爲碑文然後刊石焉

又曰扶風武王駿嘗都督雍梁病薨追贈大司馬加侍中假黃鉞西土聞其薨也泣者盈路百姓爲之樹碑長老見

碑無不下拜其遺愛如此

又曰唐彬爲幽州百姓追慕彬功德生爲立碑作頌彬初受學於東海閻德門徒甚多獨目彬有廊廟才及彬官成而德已卒乃爲之立碑

王隱晉書曰石瑞記曰永嘉初陳國項縣賈逵石碑中生金人盜取盡復生此江東之瑞

齊書曰竟陵王薨范雲是故吏上表請爲立碑文云人蓄

油素家懷鉛筆瞻彼景山徒然望慕

油素綸也筆所以理書也

三國典略曰梁宗懔少聰敏好讀書語輒引古事鄉里呼爲小學士梁主使製龍川廟碑一夜便就詰朝呈上梁王美之

又曰陸雲吳郡吳人曾製太伯廟碑吳興太守張纘罷郡經途讀其文歎美之曰今之蔡伯喈也至都言於高祖高

祖召兼尚書議郎頃之即真

後魏書曰衛操桓帝以爲輔相任以國事劉石之亂勸桓帝匡助晉氏東瀛公司馬騰聞而善之表加右軍封定襄侯桓帝崩後操立碑於邙城南以頌功德云魏軒轅之苗裔桓穆二帝馳名域外九譯宗焉有德無祿大命不延背棄華殿雲中名都遠近齊軌奔赴梓廬時晉光熙元年秋也皇興初雍州別駕鴈門段榮於大邽掘得此碑

又曰尒朱榮字天寶美容兒幼而明決長好射獵葛榮之叛也榮列圍大獵有雙兔超於馬前榮乃彎弓而拉言曰中之則擒葛榮應弦而殪三軍咸悅破賊之後即命立碑於其所號曰雙兔碑

唐書曰賈敦實宛朐人也貞觀中累除饒陽令時制大功已下不得聯職敦實兄敦頤復爲瀛州刺史甚有惠政百

姓共樹碑于大市通衢及躬實去職復刻石頌其政德立於兄碑之側故時人呼爲棠棣之碑焉

又曰貞觀中議封禪又議立碑曰勒石紀號垂裕後昆美盛德之形容闡后王之休烈其義遠矣

又曰高宗御製慈恩寺碑文及自書鐫刻既畢戊申上御安福門樓觀僧玄奘等迎碑向寺諸寺皆造幢蓋飾以金寶窮極瓌麗太常及京城音樂車數百兩僧尼執幡兩行導從士女觀者填噎街衢自魏晉已來崇事釋教未有如此之盛者也

又曰文苑傳曰李邕尤長碑頌雖貶職在外中朝衣冠及天下寺觀多賁持金帛往求其文前後所製凡數百首受納饋運亦至鉅萬時議以爲自古鬻文獲財未有如邕者有文集七十卷其張幹公行狀洪州放生碑批韋巨源謚

議文士推重之後恩思例贈秘書監

又曰長平中源寂使新羅國見有國人傳寫諷念馮定所
爲黑水碑畫鸛記韋休符之使西蕃也見其國人寫定商
山記以代屏障其文名馳於戎夷如此

又曰李華嘗爲魯山令元德季墓碑顏真卿書李陽冰篆
額後人爭模寫之號爲三絕碑

又曰裴度平淮西詔韓愈撰平淮西碑其辭多叙裴度事
時先入蔡州擒吳元濟李愬功第一愬不平之愬妻出入
禁中因許碑辭不實詔令磨之 憲宗命翰林學士段文
昌重撰文勒石

又曰蕭俛在相位時穆宗詔撰故成德軍節度使王士真
神道碑對曰目器褊狹比不能強王承宗先朝阻命事無
可觀如目秉筆不能溢美又撰進之後例行貶遺目若公

然阻絕則違陛下撫納之宜僥倖受之則非微臣平生之志臣不願爲之秉筆帝嘉而從之

又曰李絳憲宗時中官吐突承瓘自藩邸承恩寵旣爲神策軍護軍中尉嘗欲於安國佛寺建立聖德碑大興工作絳卽上言陛下布惟新之政刻積習之弊四海延頸日望德音今忽立聖德碑以示天下不廣大易稱大人者與天地合德與日月合明執契垂拱勵精求理豈可以文字而盡聖德又安可以碑表而贊皇猷若可叙述是有分限乃反虧損盛德豈謂敷揚至道哉故自堯舜禹湯文武並無建碑之事至秦始皇荒逸之君煩酷之政然夏采嶧山之碑揚誅伐之功紀巡幸之跡適足爲百王所笑萬代所譏至今稱爲失道士國之主豈可擬議於此陛下嗣高祖太宗之業舉貞觀開元之政思理不遑食從諫如順流固

可與堯舜禹湯文武方駕而行安得追秦皇暴虐不經之事而自損聖政近者閻巨源請立紀聖德碑嚴勵請立紀聖功碑陛下詳盡事宜皆不允許今忽令立此與前事頗乖況此碑旣在安國寺即不得不叙載遊觀崇飾之事述遊觀且乖理要叙崇飾又匪政經固非哲王所宜行也上納之

後唐史曰魏帥楊師厚於黎陽山採巨石將紀德政制度甚大以鐵爲車方任負載驅牛數百不由道路所經之處或壞人廬舍或發人丘墓百姓瞻望曰碑來碑石纔至而卒魏人以爲應碑來之兆

祔衡別傳曰黃祖太子射作章陵太守與衡有所之見蔡伯喈所作石碑正平一過視之歎之言好後日各歸章陵自恨不令吏寫之正平曰吾雖一遇皆識其中央第四行

中石書磨滅兩字不分明當是某字恐不諦耳因援筆書之初無所遺唯兩字不着耳章陵雖知其才明猶嫌有所脫失故遣往寫之還以校正平所書尺寸皆得初無脫誤所疑兩字故如正平所遺字也於是章陵敬服

世說曰魏武嘗過曹娥碑下楊脩讀碑背上題云黃絹幼婦外孫壠曰魏武謂脩曰卿解不荅云解魏武曰卿未可言待我思之行三十里乃曰吾已得令脩別記所知脩曰黃絹色絲也於字爲絕幼婦少女也於字爲妙外孫女子也於字爲好壠曰受辛也於字爲辭所謂絕妙好辭魏武亦記之與脩同乃歎曰我才不如卿乃覺三十里

王肅荅詔問爲瑞表曰太和六年上將辛許昌過繁昌詔問受禪碑生黃金白玉應瑞不肅奏以始改之元年嘉瑞見乎于踐祚之壇宜矣

晉令曰諸葬者皆不得立祠堂石碑石表石獸

語林曰孫興公作永嘉郡人甚輕之桓公後遣傳教令作敬夫人碑郡人云故當有才不尔桓公那得令作碑於此重之

荊州圖記曰羊叔子與鄒潤甫嘗登峴山泣曰自有宇宙便有此山由來賢達登此望如我與卿者多矣皆湮滅無聞念此使人悲傷潤甫曰公德冠四海道嗣前哲令問令望當與此山俱傳若潤甫輩乃當如公語耳後叅佐爲立碑着故望處百姓每行望碑莫不悲感杜預名爲墮淚碑

盛弘之荊州記曰冠軍縣有張詹墓七世孝廉刻其碑背曰白楸之棺易朽之衣銅鐵不入瓦器不藏嗟矣後人幸勿見傷及胡石之亂舊墓莫不夷毀而此墓儼然至元嘉六年民飢始發說者云初開金銀銅錫之器未裝雕刻之

飾爛然畢備

齊道記曰琅邪城始皇東遊至此立碑銘紀秦功德云是李斯所刻

西征記曰國子堂前列碑南北行三十五枚刻之表裏書春秋經尚書二部大篆隸科斗三種字碑長八尺今有十八枚存餘皆崩太學堂前石碑四十枚亦表裏隸書尚書周易公羊傳禮記四部本石墉相連多崩敗又太學讚碑一所漢建武中立時草創未備永建六年詔下三府繕治有魏文典論立碑今四存二敗

述征記曰下相城西北漢太尉陳球墓有三碑近墓一碑

記弟子盧植鄭玄管寧華歆等六十人

其一碑陳登碑文並蔡邕所作

酈善長水經注曰昔大禹導河積石踈波梁山所謂龍門矣孟津河口廣八十步巖際鐫跡遺功尚存岸上並有廟

祠祠前有石碑三所碑字素滅不可識也一碑是太和中

立

述異記曰崆峒山中有堯碑禹碣皆籀文焉

伏滔述帝功德銘曰堯碑

禹碣皆古不殊

虞喜志林曰贛榆縣有始皇碑潮水至則加其上三丈去則見三尺行有十二字

異苑曰吳郡岑澗碑在江乘湖西太元村人見龜從田中出還其元處萍藻猶着腹下

金樓子曰銘頌所稱興公而已夫披文相質博約溫潤吾聞斯語未見其人班固碩學尚云贊頌相似陸機鉤深猶稱碑賦如一

國朝傳記曰魏文貞之薨也太宗自製其碑文并自書後爲人所間詔令陪之及征高麗不如意深悔爲是行乃歎

曰若魏徵在不使我有此舉也既渡遼水令馳驛祀以少牢復立碑焉

又曰率更令歐陽詢行見古碑索靖所書駐馬觀之良久而去數百步復還下馬佇立疲則布毯坐觀因宿其傍三日而後去

李綽尚書故實曰東晉謝太傳墓碑樹貞石初無文字蓋重難製述之意

國史補曰韋貫之爲尚書右丞長安中爭爲碑誌若市賈然大官卒其門如市至有喧競構致不由喪家是時裴均之子圖不朽於貫之縑帛萬疋貫之舉手曰寧餓不苟

11

1. The first step is to identify the problem or question that needs to be answered. This involves understanding the context and the specific requirements of the task.

太平御覽卷第五百九十

文部六

銘

銘志附

七辭

連珠

銘

釋名曰銘者述其功美可稱名也

禮記祭統曰銘者論譏其先祖之有德善功烈勲勞慶賞
聲名列於天下而酌之祭器自成其名焉以祀其先祖者
也顯揚先祖所以崇孝也身比爲順也明示後世教也夫
銘者一稱而上下皆得焉耳矣是故君子之觀於銘也既
美其所稱又美其所爲之者明足以見之仁足以與之
智足以利之可謂賢矣賢而勿伐可謂恭矣故衛孔悝之
鼎銘曰六月丁亥公假於太廟公曰叔舅乃祖莊叔左右
成公成公乃命莊叔隨難於漢陽即宮于宗周奔走無射

啓右獻公獻公乃命成叔纂乃祖服乃考文叔興舊嗜欲

作率慶士躬恤衛國其勤公家夙夜不解民咸曰休哉公

曰叔舅予汝銘若纂乃考服悝拜稽首曰對揚以辟之勤

大命施于蒸彝鼎此衛孔悝之鼎銘也古之君子論撰其

先祖之美而明著之後世者也以此其身以重其國家如

此子孫之守宗廟社稷者其先祖無美而稱之是誣也有

善而弗知不明也知而弗傳不仁也此三者君子之所恥

也周禮夏官上司勲職曰司勲掌六卿賞地之法以等其功

曰功賞地資田也在遠郊之內屬六卿馬等由差也以功大小爲差王功曰勲成王業若國功

若伊尹也民功曰庸施法於民若右稷也事功曰勞若禹者也

民功曰力若制法成治若咎繇也戰功曰多克敵出奇若韓信陳平者

凡有功者銘於王之太常祭於大烝司勲詔之銘之言名也生則書

其神以辭也識其人與其功也死則於烝先王祭之詔謂告

其神以辭也般庚告其卿大夫曰茲予大享于先王爾祖

其從與饗之是也今漢祭功臣於廟庭

周禮冬官考工記曰黼銘曰時文思索允臻其極也銘刻之時是

也允信也臻至也極中也言是文德之君思求嘉量既成可以爲民立法者而作此量信至於道之中

以觀四國使以觀示四方

永啓厥後茲器維則也永長也厥其也茲此也又

長啓道其子孫使法則此器長用之

王隱晉書曰張載字孟陽隨父牧在蜀作劔閣銘刺史張敏表之天子命刻石於劔閣

崔鴻十六國春秋後趙錄曰勒徙洛陽晷影於褒國銘佐命功臣三十九人于函置于建德前殿

劉璠梁典曰天監六年帝以舊國漏刻乖舛乃勅貞外郎祖暕治漏成命太子舍人陸倕爲文其序曰乃詔臣爲銘按倕集曰銘一字至尊所改也

唐書太宗幸河北觀砥柱因勒銘於其上以陳盛德

穆天子傳曰天子觀春山之上乃爲銘疏於玄圃之上以

貽後世

謂勒石銘功德

大戴禮曰武王踐祚三日召士大夫而問焉曰惡有藏之約行之萬世可以爲子孫者乎師尚父曰在丹書王欲聞之則齋矣三日端冕師尚父端冕奉書而入則負屏而立王下堂南面而立父曰先王之道不北面王行西折而東面而立師尚父西面道書之言曰敬勝怠者吉怠勝敬者滅義勝欲者從欲勝義者凶以仁得之以仁守之其量百世以不仁得之以仁守之其量十世以不仁得之以不仁守之必及其世王聞書之言惕然若恐懼而爲誠書於席之四端爲銘焉

太公金匱曰武王曰吾隨師尚父之言因爲慎書銘隨身自誠其冠銘曰寵以着首將身不正遺爲德咎書履曰行

必慮正無懷僥倖書劔曰常以服兵而行道德行則福廢則覆書鏡曰以鏡自昭則知吉凶書車曰自致者急載人者緩取欲無度自致而反

皇覽記陰謀黃帝金人器銘曰武王問尚父曰五帝之誠可得聞乎尚父曰黃帝之戒曰吾之居民上也搖搖恐夕不至朝故爲金人三封其口曰古之慎言堯之居民上也振振如臨深淵舜之居民上也慄慄恐夕不見旦武王曰吾并殷民居其上也翼翼懼不敢息尚父曰德盛者守之以謙威彊者守之以恭武王曰欲如尚父言吾因是爲誠隨之身孔子家語曰孔子觀周遂入太祖后稷之廟廟當右階之前有金人焉三緘其口而銘其背曰古之慎言人也誠之哉無多言無多事多言多敗多事多害安樂必誠無所行悔勿謂何傷其禍將長勿謂何害其禍將大勿謂不聞神將伺人罔

焄弗滅炎炎若何消消不壅熬爲江河綿綿不絕或成網羅

綿綿微細若不絕則有成網羅者也豪末不札如豪之末言微者札救也將尋斧柯誠能慎

之福之垠也口是何傷禍之門也強梁者不得其死好勝者

必遇其敵盜憎主人民怨其上君子知天下之不可上也故

下之知衆人之不可先也故後之溫恭慎德使人慕之執雌

持下人莫踰之人皆趨彼我獨守此人皆惑之我獨不徙內

藏乃智不示人技我雖尊高人弗我害唯能於此也江海雖

左長於百川以其卑也天道無親嘗與善人誠之哉戒之哉

孔子既讀斯文也願謂弟子曰小子志之此言實而中情而

信詩云戰戰兢兢戰戰兢兢也如臨深淵恐也履薄冰恐也行身

如此豈口過惠哉林姆子說又載也○又孫楚反金人銘曰昔太廟

左階之前有石人焉大張其口而書其脅曰我古之多言人

也無少言無少事少言少事後生何述焉我頌三墳五典八

索九丘蹟罔深而不探理無奧而不鉤故言滿天下而無口尤夫唯言立乃可長久胡不愧然生鍼其口自拘廣庭終身义手

孔子家語曰孔子觀於魯桓公之廟見歌器焉嚙孔子問於守廟者曰此何器也對曰宥坐之器子曰吾聞宥坐之器虛則歌中則正滿則覆明君以爲至誠常置於坐側也子路進曰敢問持滿有道乎子曰聰明叡智守之以愚功被天下守之以讓勇力振世守之以怯富有四海守之以謙後之君子感誠之至追而作銘

楊子法言曰或問銘曰銘哉銘哉有意於慎也

文心雕龍曰昔軒轅帝刻輿以弼違太禹勒筭簏以招諫成湯盤盂著日新之規武王戶席題必誠之訓周公慎言於金人仲尼革容於歌器列聖鑒戒其來久矣故銘者名

也觀器必也正名審用貴乎慎德蓋臧武仲之論銘也曰天子令德諸侯計功大夫稱伐夏鑄九牧之金周勒肅慎之楷今德之事也呂望銘功於昆吾仲山鑊績於庸器計功之義也魏顥紀勲於景鍾孔惺表勤於衛鼎稱伐之類也若乃飛廉有石槨之錫雲公有奪里之謚銘發幽石噫可恠也趙靈勒跡於潘吾秦昭刻傳於華山夸誕示後吁可笑也詳觀衆例銘義見矣至於始皇勒岳政暴而文澤亦有踈通之美焉若乃班固燕然之勒張旭華陰之碣序亦成矣蔡邕之銘思燭古今橘公之鍼則吐納典譽朱穆之鼎全成碑文溺所長也至如敬通新器矱淮武銘而事非其物繁略違中崔駰品物讚多戒少李九積篇義儉辭碎著龜神物而居博奕之下衡斛嘉量而在杵臼之末曾名品之未暇何事理之能閑哉魏文九寶器利辭鈍惟張

載劒閣其才清彩迅足駸駸後發前至銘勒嶠漢得其宜矣

文章流別傳曰夫古之銘至約今之銘至煩亦有由也質文時異則既論之矣且上古之銘銘於宗廟之碑蔡邕爲楊公作碑其文典正末世之羨者也後世以來器銘之佳者有王莽鼎銘崔瑗机銘朱公叔鼎銘王粲硯銘咸以表顯功德天子銘嘉量諸侯大夫銘太常勒鍾鼎之義所言雖殊而令德一也李尤爲銘自山河都邑至于刀筆符契無不有銘而文多穢病討而潤色言可采錄

三輔史錄曰何敞字文高爲汝南太守帝南巡過郡郡有刻鏤屏風帝命侍中黃香銘之曰古典務農周鏤傷民忠在竭節義在脩身事見黃香集

銘志附

西京雜記杜子夏葬長安北四里臨終作文曰魏郡杜鄴
立志忠欵犬馬未陳奄先朝露骨肉歸於后土魂氣無所
不之何必古丘然後即化封於北郭山焉晏然處死乃命
刊名埋於墓前種松柏五株至今茂盛

西京雜記滕公駕至陳都門馬鳴跪不肯前以足跑地父
之滕公懼使卒掘其所跪之地深二尺得石擲滕公以燭
照之有銘乃以水洗之其文字古異左右莫能知問叔
孫通通曰科斗書也以今文寫之曰佳城鬱鬱三千年見
白日呼嗟滕公居此室滕公曰嗟乎天也吾死其葬此乎
於是終葬此焉

博物志曰魯閭里蔡伯公死求葬庭中有二人行頃還葬
二人復出掘土得石擲有銘曰四體不勤孰爲作生不遭
遇長附託賴得二人發吾宅閭里祠之

又曰衛靈公葬得石槨銘云不逢箕子靈公奪之我里

七辭

傳玄七謨序曰昔枚乘作七發而屬文之士若傳毅劉廣
崔駰李尤桓麟崔琦劉梁桓彬之徒承其流而作之者紛
焉七激七依七說七觸七舉七誤之篇於通儒大才馬季
長張平子亦引其源而廣之馬作七廣張造七辨或以恢
大道而導幽滯或以點瑰麥而託調咏楊暉播烈垂於後
世者九十有餘篇自大魏英賢迭作有陳王七啓王氏七
釋楊氏七訓劉氏七華從父侍中七誨並陵前而邈後揚
清風於儒林亦數篇焉世之賢明多稱七激工余以爲未
盡善也七辨似也非張氏至思比之七激未爲劣也七釋
僉曰妙焉吾無間矣若七依之卓犖一致七辨之纏綿精
巧七啓之奔逸壯麗七釋之精密閑理亦近代之所希也

摯虞文章流別論曰七發造於枚乘借吳楚以爲客主先
言出興入輦蹙壞損深宮洞房寒暑之疾靡漫美色宴
安之毒厚味暖服淫曜之害宜聽世之君子要言妙道以
疏神導體蠲淹滯之累既設此辭以顯明去就之路而後
說以聲色逸遊之樂其說不入乃陳聖人辨士講論之娛
而霍然疾瘳此因膏粱之常疾以爲臣勸雖有甚秦之辭
而不沒其諷喻之義也其流遂廣其義遂變率辭人淫
麗之尤矣崔駰旣作七依而假非有先生之言嗚呼楊雄
有言童子雕蟲篆刻俄而曰壯夫不爲也孔子疾小言破
道斯文之族豈不謂義不足而辨有餘者乎賦者將以諷
吾恐其不免於勸也傳子集古今七篇而論品之署曰七林
文心雕龍曰枚乘擒艷首製七發腴辭雲構夸麗風駭盖
七覆所發發乎嗜欲始邪末正所以戒膏粱之子也自七

發以下作者繼踵觀枚氏首唱信獨拔而偉麗矣及傳毅
七激會清要之工崔駰七依入博雅之巧張衡七辨結采
綿靡崔瑗七厲植義純正陳思七啓取美於宏壯仲宣七釋
致辨於事理觀其大抵所歸莫不高談宮館壯語田獵窮
瓌奇之服饌極蠱媚之聲色甘意搖骨髓艷辭洞塊識雖
始之以淫侈終之以居正然諷一勸百勢不自反子雲所
謂聘鄭聲曲終而奏雅樂者也七厲叙賢歸以儒道雖文
非拔羣而意實卓尔矣

連珠

傳妾留連珠者興於漢章帝之世班固賈逵傳毅三才子
受詔作之而蔡邕張華之徒又廣焉其文體辭麗而言約
不指說事情必假喻以達其旨而賢者微悟合於古詩諷
興之義欲使歷歷如貫珠易觀而可悅故謂之連珠也班

固喻美辭壯文體穢麗最得其體蔡邕言賈辭碎然其旨
篤矣賈逵而不豔傳毅文而不典


文心雕龍曰楊雄雖小而明潤矣此文章之枝流暇預之
末造也自此已後擬者間出杜篤賈逵之曹劉珣潘勗之
輩欲穿明珠多貫魚目可謂壽陵匍匐非復邯鄲之步里
醜捧心不關西子之頰矣惟士衡運思理新文敏而裁意
致句廣於舊篇豈慕朱仲四寸之璠乎夫文小易周思閑
可瞻足使義明而辭淨事圓而音澤磊磊自轉可稱珠耳
宋書劉祥著連珠十五首以寄其懷其譏議云希世之寶
違時必賤偉俗之器無聖則淪是以明王黜於楚岫章甫
窮於越人有以祥連珠啓上上令御史中丞任遐奏其過
惡付廷尉上別遣勅祥曰我當原卿性命令卿萬里思慙
卿若能改革當令卿得還乃徙廣州不意終日縱酒少時

卒

三國典略曰梁簡文爲侯景所幽作連珠曰吾聞言可覆
也人能育物是以欲輕其禮有德必昌兵賤於義無思不
服

又曰吾聞道行則五福俱湊運閉則六極所鍾是以麟出
而悲豈唯孔子途窮則慟寧止嗣宗

太平御覽卷第五百九十



太平御覽卷第五百九十一

文部七

御製上

尚書臯陶曰帝庸作歌曰勅天之命惟時惟幾乃歌曰股肱喜哉元首起哉百工熙哉臯陶拜手稽首颺言曰念哉率作興事慎乃憲欽哉屢省乃成欽哉乃庸載歌曰元首明哉股肱良哉庶事康哉又歌曰元首叢脞哉股肱隳哉萬事隳哉

漢書曰高祖還歸過沛置酒沛宮悉召故人父老子弟佐酒發沛中兒得百二十人教之歌酒酣高祖擊筑自爲歌曰大風起兮雲飛揚威加海內兮歸故鄉安得猛士兮守四方

又曰武帝求賢詔曰盖有非常之功必待非常之人故馬

或奔蹏而致千里士或有負俗之累而立功名夫泛駕之馬弛斥之士亦在御之而已泛覆也方腫也其令州縣察弛廢也斥逐也

吏民有茂才異等可爲將相及使絕國者

又曰武帝幸河東祠后土顧帝京欣然中流與群臣宴飲上歡甚乃自作秋風辭云秋風起兮白雲飛草木黃落兮濟鴈南歸蘭有秀兮菊有芳携佳人兮不能忘泛樓舫兮濟汾河橫中流兮揚素波蕭鼓鳴兮發棹歌歡樂極兮哀情多少壯幾時兮奈老何

後漢書東平憲王蒼傳曰顯宗以所自作光武本紀示蒼蒼因上卅祖受命中興頌上甚善之令校書郎賈逵爲之訓解

又曰顯宗自制五家要說章句令桓郁定於宣明殿華嶠書曰

帝自制五行章句此言五家即謂五行之家也

魏志曰武帝御軍三十餘年手不捨書晝講軍策夜則思經傳登高必賦遇物必詩及造詩被之管弦皆成樂章

魏志曰文帝行幸廣陵故城臨江觀兵戎卒十餘萬旌旗數百里帝馬上爲詩曰觀兵臨江水水流何湯湯戈矛成山林玄甲曜日光猛將懷暴怒膽氣正縱橫誰云江水廣一葦可以航不戰能屈敵戢兵稱賢良古公宅岐邑實始剪殷商孟子營虎牢鄭人懼稽顙充國務耕植先零自破亡興農淮南間築室都徐方量運宜權略六軍咸悅康豈如東山詩悠悠多悲傷

魏文帝紀曰帝好文學以著述爲務自所勒成垂百篇又使諸儒撰集經傳隨類相從凡百篇號曰皇覽

晉書曰殷仲堪爲黃門郎孝武嘗示仲堪詩曰勿以已才而笑不才

宋書曰高祖過彭城置酒命紙筆爲詩曰先蕩臨淄穢却
清河洛塵華陽有逸驥桃林無伏輪於是群才並作也
後魏書曰孝文帝雅好讀書手不釋卷五經之義覽之便
講學不師授探其精奧史傳百家無不該涉才藻富瞻好
爲文章詩賦銘頌有興而作有大手筆馬上口授及其成
也不改一字自太和已後詔策皆帝文也自餘文章百有
餘篇

三國典略曰周明帝幼而好學詞彩溫麗据撫衆書自羲
農已來訖于魏末叙爲世譜凡百卷所著文章十卷行於
世

後周書曰明帝三年秋九月幸同州過故宅賦詩曰玉燭
調秋氣金輿歷舊宮還如過白水更似入新豐霜潭漬晚
菊寒井落疎桐舉盃延故老令聞歌大風

梁書曰武帝賜張率詩曰東南有才子故能服官政余雖
慙夙昔得人斯爲盛率承詔徃復六首

又曰高祖製春景明志詩五百字勅在朝辭人沈約已下
同作高祖以王僧孺詩爲工

隋書曰陳禎明初後主作新歌詞甚哀思令後宮美人習
而歌之其辭曰玉樹後庭花花開不復久時人以歌識此
其不久兆

又曰大業三年幸榆林啓民可汗奉觴上壽拜伏甚恭帝
大悅賦詩曰鹿塞鴻旗駐龍庭翠輦迴羶帷望風舉穹廬
向日開呼韓稽顙至休屠繼踵來索辦擎羶肉韋韞獻酒
杯何如漢天子空上單于臺

國朝傳記曰煬帝善屬文而不欲人出其右司隸薛道衡
由是得罪後因事誅之曰更能作空梁落鷺泥否煬帝爲

驚歌行文士皆和著作郎王胄獨不下帝每銜之胄竟坐此見害而誦其警句曰庭草無人隨意綠復能作此語耶又曰牛弘煬帝之在東宮也數有詩書遺弘弘亦有荅及嗣位之後嘗賜弘詩曰晉家山吏部魏世盧尚書莫言先哲異奇才亦佐余學行躬時俗道素乃冲虛納言雲閣上禮儀皇運初彝倫欣有叙垂拱事端居

唐書曰太宗以武功定海內擲風沐雨不暇於詩書泊于嗣業進引忠良銳精思政朝多孜孜求之若不及數年之後天下晏和遂於聽覽之暇留精文史叙事言懷時有制作天才宏麗興記玄遠著作鄧隆請編次之詔不許

又曰太宗著金鏡述以示群臣其辭曰朕以萬機暇日遊心前文仰六代之高風觀百王之遺跡興亡之運可得言焉每至軒昊之無爲唐虞之至治未嘗不留連贊詠不能已

矣及於夏殷末世秦漢暴君使人凜然競懼如履朽薄然
人君皆欲其永享萬乘之尊以垂百王之後而得失異迹
興滅不同何也蓋短於自見不聞逆耳之言至於滅亡終
身不悟豈不懼哉觀理亂之本原足爲明鏡之鑒戒亂未
常不任不肖理未嘗不任忠賢任忠賢則享天下之福用
不肖則受天下之禍社稷臨危之主各師其臣若使覺悟
安有危亡之禍特由不留心於任使翻屬意於遨遊豈不
哀哉以遨遊將爲任使以任使將爲遨遊豈不善哉古人
言舜禹不愛於聲不貪於色予謂不然將爲愛也人云桀
紂耽於聲色子將爲不好也何以然桀紂命不終於天年
樂不終於一世以此知爲不好也舜禹命壽於終樂畢於
世予謂之愛也且夫人有寬躁強柔之志愁樂貪慾之心
性有善不善者也由是觀之堯舜禹湯躬行仁義治致隆

平比稟其善性也幽厲桀紂乃爲炮烙之刑剗孕婦割人
心斮朝涉脯鬼侯造酒池糟丘爲長夜之飲此其受於不
善之性也夫立身之道在於折衷不在於偏孰吳起曰昔
桑氏之君脩德廢武以滅其國有邕之君恃衆好勇以喪
社稷仲尼曰寬濟猛猛濟寬仁義之道猶不得偏何況於
左道乎況於不仁乎爲君之道處至極之尊以億兆爲心
以萬邦爲意安民必以文德防邊必以武功孔子曰夫文
之所加者深武之所服者大德之所施者博則威之所制
者廣不可以武威安民不可以文德備塞大鯨出水必廢
遊波之功鴻鵠沉泥定無凌空之効若各令遂志並不失
其能古人云構大厦者先擇木然後簡材治國者先擇佐
然後定民大匠構屋必以大材爲棟梁小材爲榱桷苟有
所中尺寸之木無棄此善理木者也非獨屋有棟梁國家

亦然大德爲宰相亦國之棟梁也予思三代以來君有所好民必從之在上留心臺榭奇巧之人必至致情遊獵馳騁之人遠臻有意管弦鄭衛多進降懷脂粉燕趙斯來塞切直之路爲忠者必少開諂諛之道爲佞者必多古人云君猶器也民猶水也方圓在於器不在於水以此而言足爲永戒夫王不琢不成器人不學不知道仲尼好於郊子文王學於獬叔聖人且猶如此何況於凡人乎治主思賢如農夫之望歲哲后求人若旱苗之思雨亂君嫉勝已如讎視不肖如子懷之中心何日暫忘王莽僞行仁義之道有始無終孫皓權施恩惠之風有初無末二子猶舡之汎巨浪毀在不遙若驚馬之奔千里困其將至古人云外量不以盛碩小智不可謀大巧詐不如拙誠信無謬矣有明主有暗主漢祖攝衣於

嚮生比干剖心於辛紂殷湯留情於伊尹龍逢被戮於
 夏桀楚莊暇隙而懷憂武侯罷朝而含喜閻主護短而永
 愚明主思短而長善觀漢祖殷湯仰其有德行譬若陰陽
 調四時會法令均萬民樂則騏驎呈其祥漢祖殷湯豈非
 騏驎之類乎觀夏癸商辛嗟其悖惡之甚猶政令不行寒
 暄失序則猛獸肆毒蝨蠅爲害夏癸商辛豈非猛獸之儔
 乎予以比觀之豈非天道也雖曰天時抑亦人事成湯之
 世有七年之旱剪髮爲犧千里雨降太戊之時桑穀生朝
 懼而脩德遂使十有六國重譯而來此豈非人事者也或
 云爲君難爲臣不易君處尊高之位執賞罰之權錄人之
 材因人之力何爲不成何求不得此言似易論之實難何
 者輕凌天地衆精顯其妖忽慢神靈風雨應其暴是以帝
 乙有雷震之禍殷紂致分砂之災多營池觀遠求異寶民

不得耕女不得蚕田荒業廢兆庶凋殘見其飢寒不爲之
哀覩其勞苦不爲之戚苦民之君也非治民之主也薄賦
輕徭百姓家給上無急命之徵下有謳歌之詠屈一身之
欲樂四海之民憂國之主也樂民之君也此其所以爲難
也且用人之道又爲未易已之所賢未必盡賢衆之所毀
未必全惡知能不舉即爲失才知惡不黜則爲禍胎又人
才互有長短不必兼通是以公綽優於大國之卿子產善
爲小邦之相絳侯木訥卒安劉氏之宗晉夫利口不任上林
之令捨短從長然後爲美夫人剛柔之情各異曲直之性
不同不可不察也逆主耳而履道戮孔懷以安國周公是
也順上心以安身隨君情而殺之易牙是也棄已之命存
君之身紀信是也挾國謀事以報公讎素盞是也捐身而
執節孤立而自毀屈原是也外顯和穆之端內懷湯火之

意宰詒是也忠諫之道以此觀之足以永鏡白起爲秦平趙乃被昭王所殺亞夫定七國之亂卒爲景帝所誅文種設策滅吳翻遭越王之戮五負竭誠爲國終罹賜劍之禍乃君之過也非臣之罪焉至如趙高韓信黥布陳豨之儔此自貽厥釁非君之濫刑之也高祖失於存功之能光武獲於置將之妙臣安君社稷之國君處臣危亡之地豈是相酬之道也爲天下之君處萬民之上安可易乎背道違禮非惟損己乃爲賢人之所笑卑身厲行實爲君子又爲凡夫之所譏越品進官其類必爲深怨偏與人語衆以爲曲私任使賢良則謂偶委伏凡才則言愚闇數言則謂太繁辭寡則謂道薄恣情忿怒則朝野戰慄留心寬恕則法令不行民樂則官苦官樂則民勞四海之內莫非王土要荒爲枝葉畿內爲根本古人云皮之不存毛將安傳深根

固本之內相而伊尹傳說世所希逢至如鎮積冰之塞守
飛雪之邊而魏尚李牧當今罕遇遣人遠撫則眷戀而不
忍愍而不遺則枝葉而不存二宜之間致心何所是以晨
興夕惕無忘斯事爲上猶然何況臣下易云書不盡言言
不盡意今畧陳梗槩以示心之所存耳古語云勞者必歌
其事朕非故煩翰墨以見天藻但學以爲已聊書所懷想
達見群賢不以爲嗤也

又曰太宗思隋氏失道皇運開基因而序之以明誠慎神
筆書石命工刻之以賜皇太子其詞曰昔隋季崩離天綱
弛紊波濤沸四海氣霧塞三光鬼哭石言人怨神怒丁壯
疲於兵甲老弱斃於飢寒嬰骨百城流血千里宮闕變爲
禾黍中原化爲寇場余以弱齡屬當厄運思靜大難以濟
蒼生秣馬揮戈風驅電掃克平八表臨撫萬方聊因暇景

載懷興亂歷想前代暗君庸王莫不恃其智力則輕侮聖賢驕其文才則不尊道德縱其口辯以飾非肆其姦言以拒諫昏迷酒色習近讒邪暴疾黎元窮其轍跡傾危莫悟以至滅亡明鏡不遠於焉自鑒

又曰魏徵葬日太宗登苑西樓臨路哭祭太宗復為製碑文并御書公卿士庶競來摸寫車馬填噎日有數千時人號其碑為二絕文與書也

又曰太宗幸積翠池宴五品以上太宗曰今茲年穀大登水潦不能為害天下既安邊方靜息因此農隙與公等舉酒酒既酣各宜賦一事太宗賦尚書其詞曰日昊翫百篇臨登被五典夏康既逸預商辛亦流涵恣情昏主多尅已明君鮮滅身資累惡成名由積善

又曰太宗征高麗迴次營州詔遼東戰死骸骨並集柳城

東南有司設太牢以祭之太宗臨哭盡哀從臣無不流淚
帝親爲文祭之曰忠烈蓋世徃賢明軌忘身徇國先哲良
規惟尔等懷忠立節重義輕生奮劒提戈摧城陷陣冒鋒
刃而不頽赴湯火以如歸殞命戰場殘形寇壘膏原潤鉞
身喪名存搖落寒關遂非生入蒼茫雷野無復餘蹤山川
宛其不殊存亡處焉非昔然則身者今之所重名者後之
所貴身乃常有而愚夫怯焉功則難立惟烈士成焉去一
生之短期收千載之令譽此聖賢之操也豈直忠勇者乎
所以按轡停輿撫膺一慟嘉乃誠節痛尔遺靈酒俎旣陳
竟其斯享

又曰貞觀十一年太宗幸洛陽遣使祭漢太師楊震墓太
宗自爲文曰惟君資華嚴之奇氣稟金方之秀質艷忠篤
以成性應時運而挺生彈冠贊務弼諧帝道正色立朝周

行以肅坐槐燮理鼎飴載調值安德不昇政由近習氣殄
玉衡日微黃道君慨然忠憤乃心王室昌言正議屢犯於
逆鱗霜簡且繩志祛於時蠹而運屬陵夷道消賢哲不納
嘉猷遂嬰嚴網方弘至治遽天天年英傑云亡邦國彌瘁
斯乃緬想高蹤可爲長歎朕省方班瑞言事東巡瞻墳塋
於道周想風徽於前代若使九原可作吾將與歸千載如
存依然何遠行潦致屬君其饗之

又曰高宗製元首前星維城股肱等誠以示侍臣禮部尚
書弘文館學士許敬宗又上表請摠名爲天訓并請注解
許之及注畢敬宗爲之序

又曰咸亨中上自製樂章有上元二儀三材四時五行六
律七政八風九宮十洲得一慶雲之曲以示群臣令太常
行用之

又曰咸亨中御書飛白書贊以賜中書門下三品戶部尚書戴至德詞曰汎洪源俟舟楫中書侍郎郝處俊曰飛九霄假六翮吏部侍郎李敬玄曰資啓沃罄丹誠中書侍郎崔知悌曰竭忠節贊皇猷議者以戴郝寬厚而李崔忠勤故上以此言褒美之

又曰顯慶中上以琴中雅曲古人歌之近代已來此聲頓絕令所司簡樂工解琴笙者脩習舊曲冬十月辛亥太常上書謹案禮記及家語云舜彈五弦之琴歌南風之詩是知琴操曲弄皆合於歌

又張華博物志云白雪是太帝使素女鼓五十絃琴曲名又楚大夫宋玉對襄王云有客於郢中歌揚春白雪國中和者數十人是知白雪琴曲本宜合歌以其調高人和遂寡自宋玉已來迄今千祀未有能歌白雪曲臣今准勅依

於琴中舊曲定其宮商然後教習並合於歌輒以御製雪詩爲白雪歌詞又按古今樂府奏正曲之後皆別有聲君唱臣和事彰前史輒取侍中許敬宗等奉和雪詩以爲送聲各十六節令悉教訖並皆諧韻上善之乃付太常編於樂府

又曰玄宗製令長新誠一篇頒賜天下縣令其詞曰我求令長保義下人人之所爲必有所因侵漁浸廣賦役不均使夫離散莫保其身徵諸善理寄尔良臣與之革故政在惟新調風變俗背僞歸真教先爲富惠恤於貧無大無小以躬以親青旌勸農其唯在勤墨綬行令孰不攸遵曷云被之我澤如春

又曰玄宗親製春臺望一章二十八句起居舍人蔡孚奏曰伏見所製氣雄詞美德音相屬鄙炎漢之奢侈徇有唐

之儉陋知作勞而居逸念中人之家產用心如此天下斯安臣職在司言請宣示百寮及編國史

又曰端午日玄宗自賦詩曰端午臨中夏時清日復良鹽梅已佐鼎翹蘼且傳觴事古人留迹年深縷續長當軒知槿茂向水覺蘆香億兆同歸壽群公共保昌忠貞如不替貽厥後昆芳

又曰玄宗幸寧王憲宅與諸王宴探韻賦詩上詩曰魯衛情先重親賢受轉多冕旒豐暇日乘景暫經過戚里申高宴平臺奏雅歌復尋爲善樂方驗保山河

又曰天寶八載九月甲午是日皇太子生日上製仁孝詩六章親札於步障以賜太子令中官高力士以示朝臣

太平御覽卷第五百九十一

